

Cuesture di Udin e ARLeF, unîts pe sigurece dai citadins

Cuatri videos in marilenghe pe prevenzion cuintri des trufis a cjase, al telefon, vie e-mail e al bancomat

Li trufis a son une cause frecuente di l'alarme sociâl e a àn carateristichis simpri diferentis. La prevenzion e je duncje fundamentâl par imparà a ricognossi il pericol. Cun chest obietîf, la Cuesture di Udin e à ideade e realizade une campagne impuartante di prevenzion e di sensibilizazion dai citadins.

Par rindi ancjemò plui eficaç e diret il messaç dai cuatri videos, si è zovade dal supuart de ARLeF, par indreçâ la iniziative ai citadins inte lôr marilenghe.

La campagne - valide a nivel nazionâl dal Ministeri dal Interni - e fronte lis situazions di imbrois plui comunis: al bancomat, a cjase, al telefon, vie e-mail. Cu la ironie che ju caraterize, i atôrs Caterina Tomasulo, o ben Catine, e Fabiano Fantini, Claudio Moretti e Elvio Scrucci dal Teatro Incerto a dan i conseis par evità lis trufis. Duncje, ocjo

a "no vierzi a personis che no si cognossin che a tuchin ae puarte, ancje se si presentin tant che funzionaris publics o a disin di jessi assegnâts ae riscossion di paiaments"; o a "chei che a telefonin par obleâti a firmâ il contrat di une gnove utence". Cun di plui, al vise il messaç dedicât aes trufis sul web, "mai comunicâ par pueste eletroniche dâts bancjaris o personai". E al bancomat - e continue la campagne - "sta atent che nissun ti cjali cuant che tu digjitis il Pin". In duç i câs, ancje in chel di un sempliç dubi, i citadins a son invidâts a contatâ daurman lis Fuarcis di Polizie. A



marcâlu in ogni video al è propit il Comissari Mara Lessio, de Division Anticrimin de Cuesture di Udin, che e invide a clamâ simpri, "cence pôre", il Nue (Numar Unic pes Emergjencis) 112.

La iniziative e je stade presentade dal **Cuestôr di Udin, Manuela De Bernardin**, e dal **President de ARLeF, Eros Cisilino**. Al è intervignût l'**Assessôr regjonâl aes Autonomiis locâls, Pierpaolo Roberti**.

"La sielte de comunicazion par furlan, lenghe che tancj citadins anzians a doprin ogni dì - al à marcât il **President de ARLeF** - e garantîs la ricezion clare dal messaç. Mi auguri che cheste iniziative e sedi l'inviament di une colaborazion cu la Cuesture di Udin simpri plui utile a pro de sigurece di duç i citadins."

"O ringracii la ARLeF par vè costruît cun nô un messaç che al rivarà al cûr e al cjâf di tantis personis - al à comentât il **Cuestôr** -. La Polizie di Stât e je braurose di vè realizât cheste campagne di sensibilizazion."

"Lis istituzions a àn di cjatâ la maniere di jessi il plui dongje pussibil aes personis che a rapresentin - al à declarât l'**Assessôr aes Autonomiis locâls** -. Dal sigûr, la lenghe e je un tra chei veicui une vore potents che ancje la amministrazion publiche a'nd à di tignî cont".

Partner dal projet al è il CSS di Udin. I videos si cjatin sul canâl YouTube de ARLeF e su **www.arlef.it**

Al torne Suns Europe

Cutuardis events in nûf Comuns dal Friûl: il **festival des arts in lenghe minoritarie** al torne dai 20 di Lui al 1n di Avost 2021 cu la sô setime edizion. I ospits a rivin dal País Basc, des Isulis Føroyar, de Galizie, dal Cjanton dai Grisons, de Ladinie anauniche, de Ocitanie, de Sardegne, in plui che dal Friûl.

L'apontament principâl al è il **Concierton**, ai 31 di Lui, aes 9 di sere, intal prât dal Cjistiell di Udin. La serade dedicate aes gnovis produzions musicâls furlanis e je ai 24 di Lui in place Venerio (o dai Lens) a Udin. Ma il program dal festival, in plui che la musiche, al cjape dentri tante leterature e cine.

«Ancje intal 2021 - al marche il **president de ARLeF, Eros Cisilino** -, il cartelon dal festival, cu la ARLeF tant che so sponsor principâl, al è cetant siôr. In Friûl a rivaran zovins di tantis bandis de Europe. Par dôs setemanis, la nestre tiere e sarà ancjemò une volte pont di incuintri e di confront tra i popui e partebandiere dai valôrs dal plurilinguism, dant acet a feminis e a oms che nus fasaran cognossi la lôr identitât, culturâl e linguistiche, midiand dai lengaçs plui modernis».

Suns Europe al è inmaneât de cooperative Informazione Friulana, editore di Radio Onde Furlane, cu la poie finanziarie de Region Autonome Friûl-Vignesie Julie, de ARLeF - Agenzie Regjonâl pe Lenghe Furlane, dal Comun di Udin, de Fondazione Friuli e cu la colaborazion dal Istitût Basc Etxepare e di tancj altris sogjets publics e privâts, locâi e internazionai.

Program e informazions: **www.sunseurope.com**